

Il mais da pais

Las lingias grassas e finas dal december 2020

DAVID TRUTTMANN

L'onn 2020 va vers la fin. A la fin dals quints. Finalmain. E tut las medias fan revistas e countdowns senza fin. Nus restain però tar il mais final, il december.

In stritg final – cun ina davosa radunanza – ha tratg quest mais la vischnanca da Lon en Val Schons. A partir dal proxim onn è ella part da la vischnanca fusiunada Muntogna da Schons. E cun quai va a fin l'istorgia illustrada da las pli pitschnas, ma er dadina da las pli prominentas vischnancas dal Grischun. Betg pervi dad abitants prominents sco la cuschiniera da renum Rebecca Clopath u pervi dal passlunghist da vaglia Jonas Baumann. Ma bain perquai che Lon è (u era!) probablmain la vischnanca la pli sanestra dal Grischun. Quai ha Lon demussà cler e bain tar la davosa votaziun federala, la fin da november: Cun 70 pertschient ha ella ditg gea a l'Iniziativa per concerns responsabels e cun 60 pertschient gea a l'Iniziativa per in scumond da finanzia material da guerra. Pli sanester che Lon è mo anc il Piz Beverin.

L'emprima seria da web ficziunala rumantscha, la «Metta da fein», ha gì sia premiera quest mais. Ed ella è ida a finir cun ina detga mazzacra, cun plirs morts en la hal-la polivalenta da Vrin. Bun che quella mazzacra ha gì lieu pir la fin dal film, uschiglio avessan mancà a la fin ils (paucs) statistes enta Vrin.

Avais vus gia fatg in test da corona? Ed avais er sa dumandà, nua che quel «q-tip», quel bastunet da vatta, va atgnamain a finir? Quel vegn numnadamain stuschà si dal nas e davos giu, en zonas ch'ins gnanc saveva ch'i dettia là anc in chanal accessibel per da quels bastunets. Insumma, quell'experiencescha han fatg era var 16 000 persunas en Engiadina, Val Müstair, Puschlav e Bregaglia – tar l'emprim test da massa en Svizra. Cun il resultat che 1% da la populaziun è vegnida testada positiv ed ha stuì ir direct en isolaziun. As imaginai: 16 000 q-tips per posta dad 1% «gudogn». Ils clients da banca mo siemian tar lur contos da tals tschains.

Apparentamain ha la giuria debattà senza fin e misericordia l'entschatta dal mais. Tut ils arguments èn vegnids pasads e discutads. Vi e nà. Si e giu. Ed a la fin dals quints è resultà tar la tscherna dal pled rumantsch da l'onn 2020 ina veritabla surpraisa: «la maschina». Buccas nauschas pretendan però che quella tscherna saja stada ina malchapientscha, capitada perquai che las giuroras ed ils giurors n'hajan betg sa chapì – discurrind tras lur maschinars.

La dumonda, sche la lingua rumantscha vegnia duvrada savens avunda u sch'il rumantsch survegnia la preschientscha adequata, quai è stà tema da l'entschatta enfin la fin da quest onn. E cun quella dumonda è era confruntada qua u là la vischnanca da

S-chanf. Mo che là datti apparentamain anc in auter grond problem sin la chanzlia, sco il president communal ha raquintà quest mais a la FMR: «Scha vains da scriver ün text rumantsch, stuvains der quel ad ün magister per curreger, perche ch'üngün da nus nun es pü adüso da scriver rumantsch.» – Lain sperar ch'il magister na saja a la fin betg il sulet che legia insumma quels texts.

Ina trista fin han gì quest mais gist trais lufs. L'emprim è vegnì tschiffà dal tren tranter Mustér e Sedrun. Il segund ha gì la medema sort a Surava – er sut in tren. E per finir è in terz luf anc vegnì mazzà si Siat. Sche la culpa è er stà si Siat in tren da la Viafier retica, quai vegn anc intercurì da la Polizia chantunala.

Adrian Steiger (66) ha finì sia incarica sco president communal da Flem. In redactur da la FMR è stà preschent a sia davosa radunanza communal, nua che la vischnanca ha prendì cumià ed engrazià a Steiger. Ed il redactur fitg bainvulent ha scrit che la vischnanca haja «tarmess el ella beinmeritada pensiu». Uschia pon ins era descriver en moda fitg concilianta la sconfitta brutalata tar l'elecziun, nua che Steiger ha fatg 157 vuschs e ses concurrent Martin Hug 700 vuschs! La «beinmeritada pensiu».

Sin la fin da l'onn datti en tuttas vischnancas grischunas las pli impurtantas radunanzas com-

munalas: I va per ils preventivs! En sasez ina formalitad ch'interessescha mo paucs vischins. Però quest proxim onn vegni interessant. Cun la crisa da corona sa tschenta numnadamain bainbaud la dumonda: Co funcziuna quai dal 2021 cun ils raps or da la guli-vaziun da finanzas? Pon las vischnancas «paupras» far quint era quest onn cun il «manna» giu da tschiel, cun ils raps da las vischnancas ritgas che fan ils pliffers surtut cun il turissem? Benedids sajan quels ch'han quintà pessimistic tar ils preventivs.

Per finir anc in citat final che va a prà bain per nus tuts per la fin da quest onn starmentus. Il citat vegn dad ina persuna ch'ha il nas plain da bastunets, da meds da dischinfetar, da mascrinas e distanzas e tut la salata. La FMR ha dumandà la directura dal Center da Sanadad Savognin: «Scu vogl a Vous?» – E la resposta da Christine Demarmels: «Ia sun stancla.»

In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala ed commentain quai cun in surrir. Mais per mais illustrescha il Bregagliot rumantsch *Jon Bischoff* il «Mais da pais» cun in «schurnal grafic». Cun excepziun da quest mais – questa giada ha el gist fatg in'entira pagina!